



**Los ntawm Thawj Tswj
Hwm Henry B. Eyring**

Tus Pab Cuam thib Ib hauv
Thawj Pawg Thawj Tswj Hwm

Tus Tswv lub Suab

Lus Qhuab Qhia thiab Kev Khi Lus caw txhua tus neeg hauv txhua txhia qhov chaw los mloog tus Tswv Yexus Khetos lub suab (saib D&C 1:2, 4, 11, 34; 25:16). Nov muaj Nws tej lus qhuab qhia, tej lus ceeb toom, thiab tej lus yaum kom ua raws li hais uas tau muab los ntawm kev tshwm sim rau cov yaj saub uas raug xaiv tseg lawm. Nyob hauv tej kev tshwm sim no peb yeej pom tau hais tias Vajtswv teb peb tej lus thov ntawm kev ntseeg nrog tej lus qhuab qhia, kev thaj yeeb, thiab lus ceeb toom.

Hauv peb tej kev thov Vajtswv peb xav paub seb Vajtswv xav kom peb ua dab tsi, peb yuav ua li cas thiaj li nrhiav tau kev thaj yeeb thiab kev zoo siab hauv lub neej no thiab lub neej tom ntej, thiab tias yuav muaj dab tsi rau peb rau yav tom ntej. Lus Qhuab Qhia thiab Kev Khi Lus yeej muaj tej lus teb rau cov neeg dog dig cov lus thov thiab rau cov yaj saub uas txo hwj chim thov Vajtswv. Nov yog ib qho kev coj zoo heev uas qhia peb seb peb yuav ua li cas txais tau tej lus teb rau peb cov lus nug txog kev noj qab nyob zoo ntawm lub cev thiab kev cawm seej uas nyob mus ib txhis.

Kev txo hwj chim thiab muaj kev ntseeg ntawm tus Tswv Yexus Khetos yog tej yam tseem ceeb. Oliver Cowdery tau txais lus teb ntawm tus Tswv uas hais txog nws txoj kev xav pab txhais Phau Ntawv Maumoos: “Nco ntsoov hais tias yog tsis muaj kev ntseeg ces koj ua tsis tau dab tsi li; ces cia thov nrog kev ntseeg. Tsis txhob muab tej no saib tsis rau nqi; tsis txhob thov tej

yam uas tsis tsim nyog rau koj thov” (D&C 8:10).

Tus Tswv tau hais ntau zaus hauv Lus Qhuab Qhia thiab Kev Khi Lus, tias yuav tsum muaj kev ntseeg thiab kev txo hwj chim ua ntej tso Nws mam li pab. Vim li no ces lub ntsiab ntawm Nws tej lus teb yuav tsis yog teb raws li peb txoj kev xav tau. Qee lub sij hawm cov lus teb kuj yuav tsis yooj yim rau peb txais thiab.

Lub Koom Txoos tej keeb kwm thiab tej uas tau muaj yav tas los rau peb cov poj koob yawm txwv qhia tau hais tias qhov no muaj tseeb tiag. Kuv yawg koob Henry Eyring tau rau siab thov Vajtswv heev thaum nws tau hnov txog txoj moo zoo uas raug muab txum tim rov qab los thaum xyoo 1855. Cov lus teb tau los rau nws hauv ib qho kev npau suav.

Nws ua npau suav hais tias nws tau zaum ntawm ib lub rooj sab laj nrog Txwj Laug Erastus Snow hauv Pawg Kaum Ob Tug Thwj Tim thiab nrog rau ib tug txwj laug npe hu ua William Brown. Txwj Laug Snow tau qhia txog tej nsiab cai ntawm txoj moo zoo ntev yuav luag li ib teev. Ces Txwj Laug Snow tau hais tias, “Los ntawm Yexus Khetos lub npe kuv txib kom koj mus ua kev cai raus dej thiab tus txiv neej no [Txwj Laug Brown] . . . yuav muab koj ua kev cai raus dej.”¹ Kuv tsev neeg zoo siab heev uas Henry Eyring tau muaj kev ntseeg thiab kev txo hwj chim los ua kev cai raus dej thaum 7:30 sawv ntxov hauv lub pas dej nag hauv St. Louis, Missouri, USA, tus muab nws ua kev cai raus dej yog Txwj Laug Brown.

Cov lus teb nws cov lus thov Vajtswv tsis yog ib lub suab hais lus nrov nrov los ntawm tus Tswv los. Cov lus teb los ntawm ib txog kev ua yog toog thiab kev npau suav hauv hmo ntuj, li uas tau teb rau Lihais (saib 1 Nifais 8:2).

Tus Tswv twb tau qhia rau peb lawm hais tias cov lus teb qee zaum yeej yuav los rau hauv peb tej siab li ib txoj kev xav thiab. Nyob hauv Lus Qhuab Qhia thiab Kev Khi Lus, Nws tau qhia rau Oliver Cowdery tias, “Saib seb, kuv yuav qhia rau koj nyob hauv koj lub siab ntsws, los ntawm tus Vaj Ntsuj Plig Dawb Huv, uas yuav los rau koj thiab yuav nyob rau hauv koj lub siab” (D&C 8:2).

Thiab Nws tau yaum Oliver li no hais tias: “Kuv tsis tau hais lus ua rau koj lub siab kaj txog qhov no los? Koj tseem yuav tau ib qho tim khawv dab tsi uas loj tshaj li qhov uas los ntawm Vajtswv los?” (D&C 6:23).

Lus Qhuab Qhia thiab Kev Khi Lus, lub Koom Txoos zaj keeb kwm, thiab zaj keeb kwm uas Henry Eyring tau sau tseg hais txog nws txoj kev ua tub txib tom qab nws txoj kev ua kev cai raus dej tau qhia rau kuv hais tias tej lus teb yeej yog cov lus ceeb toom thiab kev thaj yeeb tib si.

Thaum lub Plaub Hlis Ntuj 1857, Txwj Laug Parley P. Pratt ntawm Pawg Kaum Ob tug Thwj Tim tau mus koom ib lub rooj sab laj ntawm qhov chaw uas tam sim no yog Oklahoma, Teb Chaws Amelikas. Henry Eyring tau sau tseg hais tias Txwj Laug Pratt “nyuab siab thiab ntshai tias tsam muaj teeb meem dab tsi . . . , tsis paub txog yav tom ntej los sis yuav ua li cas thiaj li kiav dim li.”² Henry tau sau txog tej xov xwm uas tu siab kawg txog Thwj Tim uas raug luag muab tua. Txawm hais tias Txwj Laug Pratt muaj ntsis ntshai los nws cia li taug kev mus li lawm thiab, ua ib yam li tus Yaj Saub Yauxej Xamiv tau ua thaum nws mus rau tom Carthage.

Kuv hais lus tim khawv hais tias tus Tswv yeej teb cov lus thov Vajtswv thaum peb txo hwj chim thiab muaj kev ntseeg thov txhua lub sij hawm. Lus Qhuab Qhia thiab Kev Khi Lus thiab tej yam uas tau muaj los rau peb tus kheej qhia rau peb kom ua li cas thiaj li paub txog tej lus teb thiab txais tej lus teb nrog kev ntseeg txawm hais tias yog lus koj kev, lus ua tim khawv txog qhov tseeb, los sis lus ceeb toom. Kuv

thov Vajtswv kom txhua lub sij hawm peb yuav mloog thiab paub tus Tswv lub suab hlub.

LUS CIM

1. “The Journal of Henry Eyring: 1835–1902” (daim ntawv sau yog ib daim ntawv uas tus kws sau no muaj).
2. “The Journal of Henry Eyring: 1835–1902.”

QHIA LOS NTAWM TSAB XOV NO

1. Xav saib puas tsim nyog nyeem cov nqe lus uas hais txog kev thov Vajtswv hauv zaj lus no ua ke. Thaum koj nyeem, hais kom lawv ua tib zoo mloog saib Vajtswv ua li cas teb tej lus thov Vajtswv. Xav saib puas tsim nyog hais lus tim khawv txog qhov tseem ceeb ntawm kev thov Vajtswv.

2. Hauv Lus Qhuab Qhia thiab Kev Khi Lus muaj cov lus teb tej lus nug uas cov neeg thov Vajtswv txog. Yog hais tias tej lus teb rau lawv cov lus nug (kev tshwm sim) tsis muaj sau tseg ne, yuav zoo li cas? Yaum kom tsev neeg xyaum los paub thiab ua raws li tej kev tshoov siab ntawm tus Ntsuj Plig. Saib lawv puas xav sau tseg rau hauv lawv phau ntawv ceev xwm txheej tias lawv xav li cas txog kev thov Vajtswv.

COV HLUAS

Mloog tej Kev Tshoov Siab

Los ntawm María Isabel Molina

Muaj ib hmos kuv tus viv ncaus kwv tij uas tseem yau heev khiav mus lawm, ces kuv txawm maj ceev ceev mus nrhiav nws. Thaum kuv tsav tsheb, kuv thov Vajtswv kom tus Ntsuj Plig pab kuv. Kuv yeej paub hais tias Vajtswv yuav teb thiab koj kuv kev, ces kuv sim ua tib zoo mloog tus Ntsuj Plig tej kev tshoov siab. Tab sis thaum kuv tsis hnov dab tsi li, ces kuv txawm pib tas kev cia siab thiab xav tias tus Ntsuj Plig tsis qhia dab tsi rau kuv li.

Txawm tias kuv xav mus deb mus nrhiav, los ua cas kuv pheej xav tias kuv yuav tsum nyob ze rau ntawm thaj chaw ntawm tus viv ncaus kwv tij lub tsev. Ces kuv txiav txim siab tias tsav tsheb rov qab mus ncig thaj chaw ib zaug ntxiv. Thaum kuv nres ntawm ib txoj kev sib tshuam, kuv txawm pom ib tug duab zoo li ib tug me nyuam ntxhais taug kev. Kuv nrhiav tau kuv tus viv ncaus kwv tij lawm!

Thaum kuv tawm hauv tsheb thiab khiav los mus rau

ntawm nws, kuv mam li paub hais tias tus Ntsuj Plig yeej pab coj kuv kev pab qhia rau kuv lub siab kom kuv nyob twj ywm ntawm tib qho chaw qub ntawd. Vim hais tias kuv pheej mloog zoo zoo saib puas hnov lub suab hais lus yau yau xwb, ces kuv twb yuav luag tsis ua raws li tus Ntsuj Plig txoj kev tshoov siab. Thaum ntawd kuv thiaj li to taub hais tias feem ntau peb yuav tsis hnov ib lub suab, tab sis peb yuav hnov hauv peb nruab siab xwb.

Kuv ua tsaug ntau rau tus Ntsuj Plig txoj kev coj. Muaj tseeb tiag nws yeej nyob ze txhua lub sij hawm! Ua li vaj lug kub hais, “Tus Vaj Ntsuj Plig Dawb Huv yuav nrog nraim koj nyob” (D&C 121:46).

Yog hais tias peb ua neeg tsim nyog tau tus Ntsuj Plig txoj kev coj thiab peb ua tib zoo mloog, ces peb yuav ua tau Vajtswv ob txhais tes los ua tau ntau yam zoo pab rau coob tug neeg. Thaum muaj tus Ntsuj Plig nrog nraim peb nyob, ces peb yuav paub hais tias peb yuav tsum mus rau qhov twg.

COV ME NYUAM

Tej Yam uas Muaj Los Thaum Thov Vajtswv

Thawj Tswj Hwm Eyring qhia hais tias muaj ntau txoj kev uas yuav teb cov lus thov Vajtswv. Koj yeej yuav nrhiav tau tej kev no hauv vaj lug kub.

Nrhiav cov vaj lug kub hauv qab no. Sau tseg rau hauv koj phau ntawv ceev xwm txheej, saib vaj lug kub hais li cas txog tej lus teb rau cov lus thov Vajtswv.

Koj kuj ho sau tseg rau hauv koj phau ntawv ceev xwm txheej txog tej uas tau muaj rau koj thaum Vajtswv teb koj cov lus thov thiab.

Yauhas 14:6

Doctrine and Covenants 6:22–23

Doctrine and Covenants 8:2

Doctrine and Covenants 9:8–9

Paj Lug 8:10–11



Cov Tub Txib txoj Hauj Lwm

Ua tib zoo thov Vajtsuv kawm tej yam no thiab, thaum tsim nyog ua, sib tham txog tej no nrog cov viv ncaus uas koj mus xyuas. Siv tej lus nug no pab koj txhawb koj cov viv ncaus lub zog thiab ua kom lub Koom Haum Niam Tsev muaj feem hauv koj lub neej.

Kev Ntseeg, Tsev Neeg, Kev Pab

Cov Neeg Ntseeg hauv Hnub Nyoog Kawg raug txib kom mus “ua hauj lwm hauv [tus Tswv] lub vaj uas yog cawm tib neeg txoj sia” (D&C 138:56), nov kuj suav cov tub txib tej hauj lwm thiab. Peb tsis tas yuav tsum raug hu mus ua tub txib es peb mam li qhia txoj moo zoo. Yeej muaj lwm cov neeg nyob ntawm peb ib ncig uas xav tau tej koob hmoov ntawm txoj moo zoo, thiab yog peb npaj peb tus kheej, ces tus Tswv thiaj yuav siv peb los pab. Cov mus saib xyuas tom tsev yuav ua lawv txoj hauj lwm thiab pab “kom tib neeg txais tau txoj kev tsis txawj tuag thiab txoj sia nyob mus ib txhis.” (Mauxes 1:39).

Thaum tus Yaj Saub Yauxej Xamiv txhim tsa lub Koom Haum Niam Tsev thaum xyoo 1842, nws tau hais tias cov poj niam tsis yog yuav tsum saib xyuas cov neeg pluag xwb tab sis yuav tsum cawm neeg txoj sia thiab.¹ Peb lub hom phiaj tseem yog tib lub no.

“Tus Tswv . . . yuav muab tim khawv txog qhov tseeb rau cov neeg uas yuav qhia tau rau lwm tus neeg,” Thawj Tswj Hwm Dieter F. Uchtdorf, tus Pab Cuam thib Ob hauv Thawj Pawg Thawj Tswj Hwm tau hais. “Ntxiv mus, tus Tswv yeej xav kom cov neeg ntseeg hauv Nws lub Koom Txoos ‘qhib [lawv tej qhov ncau] txhua lub sij hawm, los tshaj tawm [Nws] txoj moo zoo nrog kev

zoo siab’ (D&C 28:16). . . . Qee zaum ib zag lus tim khawv yuav pab tau ib tug neeg lub neej mus ib txhis.”²

Los ntawm cov Vaj Lug Kub

Doctrine and Covenants 1:20–23; 18:15; 123:12

Los ntawm Peb zaj Keeb Kwm

Olga Kovářová uas yog ib tug neeg uas thaum ub nyob hauv Czechoslovakia teb nws zaj dab neeg yog ib tug yam txwv uas qhia txog cov neeg ntseeg txoj kev ua tub txib nyob hauv peb lub Koom Haum Niam Tsev keeb kwm. Thaum xyoo 1970, Olga yog ib tug tub kawm ntawv qib siab (doctoral) thiab nws kuj au siab nrhiav lub neej ntawm sab ntsuj pliaj. Nws pom ib tug neeg muaj 75 xyoos Otakar Vojkůvka, uas yog ib tug Neeg Ntseeg hauv Hnub Nyoog Kawg. “Kuv ntsia nws zoo li nws muaj xya caum tsib xyoos tiam sis hauv nws lub siab yog li kaum yim xyoo xwb thiab nws muaj kev xyiv fab puv npo,” Olga tau hais. “Qhov nov txawv heev vim hais tias hauv Czechoslovakia lub sij hawm ntawd yog ib lub sij hawm tsis muaj kev cia siab li.”

Olga tau nug Otakar thiab nws tsev neeg tias lawv ua li cas thiaj li muaj kev xyiv fab. Lawv tau qhia nws txog lwm cov Neeg Ntseeg ntawm lub Koom Txoos thiab tau muab ib Phau Ntawv Maumoos

rau nws. Nws rau siab nyeem phau ntawv heev li thiab tsis ntev tom qab ntawd ces nws tau ua kev cai raus dej thiab tau raug kev pom zoo. Txij li thaum ntawd los ces Olga yeej tau ua qhov zoo los li lawm rau hauv ib ntiaj teb uas raug kev tsim txom ntawm kev coj noj coj ua thiab ntawm kev ntseeg. Nws tau ua ib tug Thawj Tswj Hwm hauv lub Koom Haum Niam Tsev rau nws ceg ntseeg uas muaj neeg tsawg tsawg thiab tau pab cawm neeg txoj sia los ntawm kev coj lawv los cuag Khetos.³

LUS CIM

1. Saib *Teachings of Presidents of the Church: Joseph Smith* (2007), 453.
2. Dieter F. Uchtdorf, “Waiting on the Road to Damascus,” *Liahona*, Tsib Hlis Ntuj 2011, 76–77.
3. Saib *Daughters in My Kingdom: The History and Work of Relief Society* (2011), 92–95.

Kuv Yuav Pab Li Cas?

1. Kuv puas ua raws li kev tshoov siab ntawm tus Vaj Ntsuj Plig Dawb Huv thaum kuv hais kuv zaj lus tim khawv rau cov viv ncaus uas kuv mus xyuas?
2. Kuv ua li cas pab cov viv ncaus uas kuv yuav tsum saib xyuas los kawm txoj moo zoo?

Kom tau ntaub ntawv xov xwm ntxiv, cia li txuas rau reliefsociety.lds.org.

© 2013 los ntawm Intellectual Reserve, Inc. Ceev txhua txoj cai. Luam tawm hauv Teb Chaws Amelikas. Pub txhais ua lus As Kiv: 6/12. Pub txhais ua lus Hmoob: 6/12 Kev txhais *Visiting Teaching Message, January 2013*. Hmong. 10661 295